
OFFERYNNAU STATUDOL
CYMRU

2022 Rhif 1314 (Cy. 264)

**Y GWASANAETH IECHYD
GWLADOL, CYMRU**

**Rheoliadau'r Gwasanaeth Iechyd
Gwladol (Gwasanaethau Fferyllol)
(Cymru) (Diwygio) 2022**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn diwygio Rheoliadau'r Gwasanaeth Iechyd Gwladol (Gwasanaethau Fferyllol) (Cymru) 2020 (O.S. 2020/1073 (Cy. 241)) ("y Rheoliadau Fferyllol"). Mae'r Rheoliadau Fferyllol yn llywodraethu'r modd y darperir gwasanaethau fferyllol fel rhan o'r Gwasanaeth Iechyd Gwladol yng Nghymru o dan Ran 7 o Ddeddf y Gwasanaeth Iechyd Gwladol (Cymru) 2006 ("y Ddeddf").

Mae'r cynllun ar gyfer talu am wasanaethau fferyllol a gwasanaethau fferyllol lleol yn Rhan 7 o'r Ddeddf wedi ei sylfaenu ar y sail y bydd yr awdurdodau penderfynu ar gyfer tâl fferyllol fel arfer yn cynnwys, yn y taliadau am y gwasanaethau hynny, swm sydd mewn cysylltiad â'r pris a dalwyd (ond sydd fel arfer ychydig yn fwy na'r pris hwnnw) gan ddarparwyr gwasanaethau pan wnaethant brynu'r eitemau presgripsiwn y maent yn eu cyflenwi neu'n eu rhoi i gleifion GIG. Fodd bynnag, mae pwerau yn Rhan 7 i alluogi dewisiadau eraill heblaw'r trefniadau tâl arferol hyn o dan rai amgylchiadau.

Mae rheoliad 4 yn mewnosod rheoliad newydd 55A yn y Rheoliadau Fferyllol sy'n darparu, pan fo Gweinidogion Cymru neu'r Ysgrifennydd Gwladol wedi prynu brechlynnau rhag y coronafeirws, meddyginiaethau gwrthfeiol yn erbyn y coronafeirws neu frechlynnau rhag y fflw yn ganolog, ac y rhoddir y cynhyrchion hynny ar gael i fferyllfeydd cymunedol heb gost, fod yr awdurdodau penderfynu ar gyfer tâl fferyllol i osod pris ad-dalu o sero neu bris nominal ar gyfer y GIG am y cynhyrchion hynny, os yw amodau penodol wedi eu bodloni. Fodd bynnag, nid yw hyn yn atal yr awdurdodau penderfynu rhag talu fferyllfeydd cymunedol am y gwasanaethau (megis gwasanaethau

proffesiynol) y maent yn eu darparu ar y cyd â chyflenwi neu roi'r brechlynnau hynny neu'r meddyginiaethau gwrthfeiol hynny.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, ystyriwyd nad oedd yn angenrheidiol cynnal asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn.

OFFERYNNAU STATUDOL
CYMRU

2022 Rhif 1314 (Cy. 264)

**Y GWASANAETH IECHYD
GWLADOL, CYMRU**

**Rheoliadau'r Gwasanaeth Iechyd
Gwladol (Gwasanaethau Fferyllol)
(Cymru) (Diwygio) 2022**

Gwnaed *11 Rhagfyr 2022*

Gosodwyd *gerbron* *Senedd*
Cymru *13 Rhagfyr 2022*

Yn dod i rym *6 Ionawr 2023*

Mae Gweinidogion Cymru yn gwneud y Rheoliadau a ganlyn drwy arfer y pwerau a roddir iddynt gan adrannau 80(2), 88(6), (8A)(a) ac (c), (8B)(b) ac (8D), a 203(9) a (10) o Ddeddf y Gwasanaeth Iechyd Gwladol (Cymru) 2006(1).

Ar yr adeg y gwneir y Rheoliadau hyn, mae Gweinidogion Cymru yn ystyried, at ddibenion adran 88(8A)(c) o'r Ddeddf honno, fod y coronafeirws yn glefyd pandemig.

Enwi a chychwyn

1. Enw'r Rheoliadau hyn yw Rheoliadau'r Gwasanaeth Iechyd Gwladol (Gwasanaethau Fferyllol) (Cymru) (Diwygio) 2022 a deuant i rym ar 6 Ionawr 2023.

(1) 2006 p. 42. *Gweler* adran 206(1) o Ddeddf y Gwasanaeth Iechyd Gwladol (Cymru) 2006 ("y Ddeddf") am y diffiniadau o "prescribed" a "regulations", sy'n berthnasol i'r pwerau sy'n cael eu harfer. Diwygiwyd adran 80 gan Ddeddf Iechyd a Gofal Cymdeithasol 2012 (p. 7), adrannau 220(8) a 213(7). Diwygiwyd adran 88 gan Ddeddf Cyflenwadau Meddygol Gwasanaethau Iechyd (Costau) 2017 (p. 23), adran 2 a chan Ddeddf Iechyd a Gofal 2022 (p. 31), adran 161(2).

Diwygio Rheoliadau'r Gwasanaeth Iechyd Gwladol (Gwasanaethau Fferyllol) (Cymru) 2020

2. Mae Rheoliadau'r Gwasanaeth Iechyd Gwladol (Gwasanaethau Fferyllol) (Cymru) 2020(1) wedi eu diwygio yn unol â rheoliadau 3 a 4.

Diwygio rheoliad 2

3. Yn rheoliad 2 (dehongli), ym mharagraff (1), yn y lle priodol yn nhrefn yr wyddor mewnosoder—

“mae i “coronafeirws” yr ystyr a roddir i “coronavirus” yn adran 1(1) o Ddeddf y Coronafeirws 2020(2) (ystyr “coronafeirws” a therminoleg gysylltiedig);”.

Rheoliad newydd 55A

4. Ar ôl rheoliad 55 (y Tariff Cyffuriau a thâl ar gyfer fferyllwyr GIG a chontractwyr cyfarpar GIG) mewnosoder—

“Ad-daliad sero neu nominal am gost y cynnyrch ar gyfer brechlynnau rhag y coronafeirws, meddyginiaethau gwrthfeirwl yn erbyn y coronafeirws a brechlynnau rhag feirws y fflw

55A.—(1) Yn achos y cyffuriau neu'r meddyginiaethau y mae paragraff (2) yn gymwys iddynt, rhaid i awdurdodau penderfynu sicrhau, o ran penderfyniadau o dan adran 88 o Ddeddf 2006 (tâl ar gyfer personau sy'n darparu gwasanaethau fferyllol) mewn cysylltiad â thâl fferyllol sy'n ymwneud â chyflenwi neu roi'r cyffuriau hynny neu'r meddyginiaethau hynny, naill ai—

- (a) nad ydynt yn darparu, nac yn caniatáu, i unrhyw ad-daliad gael ei dalu am gost y cyffur neu'r feddyginiaeth (ac felly pris sylfaenol y cyffur neu'r feddyginiaeth, at ddibenion y Tariff Cyffuriau, yw sero), neu
- (b) nad ydynt ond yn darparu, neu ond yn caniatáu, i ad-daliad nominal gael ei dalu am gost y cyffur neu'r feddyginiaeth.

(2) Mae'r paragraff hwn yn gymwys—

- (a) i gyffur neu feddyginiaeth a ddefnyddir i frechu neu imiwneiddio pobl rhag y coronafeirws (“brechlyn rhag y coronafeirws”), os yw'r amodau a

(1) O.S. 2020/1073 (Cy. 241).

(2) 2020 p. 7.

nodir ym mharagraff (3) wedi eu bodloni,

- (b) i gyffur gwrthfeiol neu feddyginiaeth wrthfeiol a ddefnyddir i atal neu drin y coronafeirws (“meddyginiaeth wrthfeiol yn erbyn y coronafeirws”), os yw’r amodau a nodir ym mharagraff (4) wedi eu bodloni, neu
- (c) i gyffur neu feddyginiaeth a ddefnyddir i frechu neu imiwneiddio pobl rhag feirws fflw (“brechlyn rhag y fflw”), os yw’r amodau a nodir ym mharagraff (5) wedi eu bodloni.

(3) Yr amodau a nodir yn y paragraff hwn yw—

- (a) bod naill ai Gweinidogion Cymru neu’r Ysgrifennydd Gwladol wedi prynu brechlynnau rhag y coronafeirws i’w cyflenwi fel rhan o’r gwasanaeth iechyd,
- (b) bod Gweinidogion Cymru wedi gwneud trefniadau i’r cyfan neu ran o’r stoc o frechlynnau rhag y coronafeirws, a brynwyd fel y crybwyllir yn is-baragraff (a), gael ei chyflenwi i fferyllwyr GIG, pa un ai’n uniongyrchol neu drwy gyfryngwr, heb gost i’r fferyllwyr GIG,
- (c) bod Bwrdd Iechyd Lleol wedi gwneud trefniadau ar gyfer rhoi brechlynnau rhag y coronafeirws o’r stoc a grybwyllir yn is-baragraff (b) yn unol ag unrhyw gyfarwyddydau a roddir iddynt gan Weinidogion Cymru o dan adran 12 o Ddeddf 2006 (swyddogaethau Byrddau Iechyd Lleol), a
- (d) bod y brechlyn rhag y coronafeirws o dan sylw yn dod o’r stoc honno a’i fod yn cael ei roi fel rhan o’r gwasanaeth iechyd.

(4) Yr amodau a nodir yn y paragraff hwn yw—

- (a) bod naill ai Gweinidogion Cymru neu’r Ysgrifennydd Gwladol wedi prynu meddyginiaethau gwrthfeiol yn erbyn y coronafeirws o fath penodol i’w cyflenwi fel rhan o’r gwasanaeth iechyd,
- (b) bod Gweinidogion Cymru wedi gwneud trefniadau i’r cyfan neu ran o’r stoc o’r math penodol hwnnw o feddyginiaeth wrthfeiol yn erbyn y coronafeirws, a brynwyd fel y

crybwyllir yn is-baragraff (a), gael ei chyflenwi i fferyllwyr GIG, pa un ai'n uniongyrchol neu drwy gyfryngwr, heb gost i'r fferyllwyr GIG, ac

(c) o ran y feddyginiaeth wrthfeiol yn erbyn y coronafeirws o dan sylw—

(i) ei bod yn dod o'r stoc honno, neu

(ii) nad yw'n dod o'r stoc honno ond serch hynny ei bod y math penodol o feddyginiaeth wrthfeiol yn erbyn y coronafeirws sydd ar gael heb gost i fferyllwyr GIG o dan y trefniadau a grybwyllir yn is-baragraff (b).

(5) Yr amodau a nodir yn y paragraff hwn yw—

(a) bod naill ai Gweinidogion Cymru neu'r Ysgrifennydd Gwladol wedi prynu brechlynnau rhag feirws y fflw i'w cyflenwi fel rhan o'r gwasanaeth iechyd,

(b) bod Gweinidogion Cymru wedi gwneud trefniadau i'r cyfan neu ran o'r stoc o frechlynnau rhag feirws y fflw, a brynwyd fel y crybwyllir yn is-baragraff (a), gael ei chyflenwi i fferyllwyr GIG, pa un ai'n uniongyrchol neu drwy gyfryngwr, heb gost i'r fferyllwyr GIG,

(c) bod Bwrdd Iechyd Lleol wedi gwneud trefniadau ar gyfer rhoi brechlynnau rhag feirws y fflw o'r stoc a grybwyllir yn is-baragraff (b) yn unol ag unrhyw gyfarwyddydau a roddir iddynt gan Weinidogion Cymru o dan adran 12 o Ddeddf 2006 (swyddogaethau Byrddau Iechyd Lleol), a

(d) bod y brechlyn rhag feirws y fflw o dan sylw yn dod o'r stoc honno a'i fod yn cael ei roi fel rhan o'r gwasanaeth iechyd.

(6) At ddibenion paragraff (4), caiff Gweinidogion Cymru briodweddau'r math penodol o feddyginiaethau gwrthfeiol yn erbyn y coronafeirws sydd ar gael heb gost i fferyllwyr GIG drwy gyfeirio at y modd y cyflwynir y cyffur neu'r feddyginiaeth yn unig (yn ogystal â thrwy gyfeirio at gynhwysyn actif y cyffur neu'r feddyginiaeth, cryfder y cyffur neu'r feddyginiaeth, neu unrhyw briodweddau eraill sy'n hynodi'r cyffur neu'r feddyginiaeth, neu gyfuniad o unrhyw rai o'r priodweddau hynny).

(7) Er mwyn osgoi amheuaeth, caniateir serch hynny i benderfyniadau o dan adran 88 o Ddeddf 2006 nad ydynt, yn unol â'r rheoliad hwn—

- (a) yn darparu, nac yn caniatáu, i unrhyw ad-daliad gael ei dalu am gost cyffur neu feddyginiaeth (ac felly pris sylfaenol y cyffur neu'r feddyginiaeth, at ddibenion y Tariff Cyffuriau, yw sero), neu
- (b) ond yn darparu, neu ond yn caniatáu, i ad-daliad nominal gael ei dalu am gost cyffur neu feddyginiaeth,

ddarparu neu ganiatáu i dâl gael ei dalu am unrhyw wasanaeth a ddarperir gan fferyllydd GIG y cyflenwir neu y rhoddir y cyffur neu'r feddyginiaeth fel rhan ohono.

(8) Yn y rheoliad hwn—

- (a) ystyr “ad-daliad nominal”, yn achos cyffur sydd wedi ei ddarparu neu feddyginiaeth sydd wedi ei darparu heb gost i fferyllydd GIG, yw talu swm sy'n cael ei dalu yn lle'r swm y byddai'r fferyllydd GIG fel arfer yn ei ennill o'r gwahaniaeth rhwng—
 - (i) y swm a dalodd am y cyffur pan wnaeth ei brynu neu am y feddyginiaeth pan wnaeth ei phrynu, a
 - (ii) y swm a delir iddo gan y Bwrdd Iechyd Lleol perthnasol mewn cysylltiad â chost y cyffur hwnnw neu'r feddyginiaeth honno (gan amlaf y pris sylfaenol a restrir yn y Tariff Cyffuriau), os yw'n cyflenwi neu'n rhoi'r cyffur hwnnw neu'r feddyginiaeth honno o dan drefniadau ar gyfer darparu gwasanaethau fferyllol, a
- (b) mae i “gwasanaeth iechyd” yr ystyr a roddir i “health service” yn adran 206(1) o Ddeddf 2006.”

Eluned Morgan

Y Gweinidog Iechyd a Gwasanaethau Cymdeithasol,
un o Weinidogion Cymru
11 Rhagfyr 2022